

三朝遼事實錄

三朝遼事實錄卷之三

黎陽王在晉明初父編

男會苾稗芻父較閱

庚申六月奴酋乘經畧閑邊離遼陽以萬騎由撫順關

萬騎由東州堡入溪至渾河總兵賀世賢柴國柱設

防瀋陽却之○發帑金二十萬關陝永保逃兵嚴檄

招撫○時大將李懷信引疾歸周永春聞艱移駐前

屯薦袁應泰巡撫○熊廷弼以奴酋招降逆書上

聳言逆奴以徽欽見辱此正主辱臣死之時願內閣

兵部同心發憤毋爲逆奴所侮○廷弼以軍士勞苦

不堪痛哭之狀乞恩上命戶工二部發銀三十

萬兩犒之○廷弼奏劉國縉報費之數旣與餉司不同閱臣復命之疏又與國縉揭不同多寡重複乞行查笑改正薛鳳翔言國縉兵逃失伍不見引罪之章輒稱單騎之赴作非主非客之官不受經臣節制當令速回聽勘從之○保靖土官彭象軋兵至涿州一夕逃散○周永春告病不允○廷弼以病告休不許○御史張銓奏國家之禍皆起于民窮財盡屢畝加賦七厘未已而九厘窮民何以堪此大內積金如瓦礫而發帑之請呌閹不應加派之議朝奏夕可豈財爲皇上之財而民非皇上之民耶○邊臣

傳言朝鮮私通建酋朝鮮王遣陪臣奏辯言不能焚
書斬使亦兵家詭計心實自明 詔慰諭之○王在
晉題東人一飽未能三征併急人心渙散亂萌已徵
勢不成則曰奉募充兵勢一成則卽聚衆爲寇觀城
縣被刼倏忽聚散廣緝無踪召兵卽召亂之先聲聚
兵釀聚寇之實禍東省距北直一厘進之則爲北直
應募之兵退之則爲山東思逞之盜矧歲時相迫若
驅之使然故舉 朝憂遼左之饑卒而臣則先憂東
省之饑民也

撫臣不可不軫先憂預爲消弭晉在任而蓮妖不

敢發。無幾何時。而山東大亂矣。

七月山東巡撫王在晉題請。糴價云東省派運米豆。糴價脚價大約需銀六十萬兩。年時豐歉無恒。豐年當發銀預糴。以爲凶歲之備。臣疏已明言之矣。今本年海運見存新舊遼餉止十分之四耳。尚餘三十餘萬兩。無從措處。該部不發銀而且催司帑。那解濟遼。豈以東省爲金穴耶。不惟不發銀預糴。而且發碾積穀三十八萬石。豈以東省爲敖倉耶。夫東省自四十三四年游荒逃竄。死亡人類相啗。骨肉相殘。生齒已虛大半。所剩者逃荒之白土耳。彼時庫藏罄懸。所以

請及上方賑貸年來接括殆盡其無長物可知是那借之說未可問及山東以山東無銀可借也州縣稍有積穀未嘗不借充海運然須留穀本爲將來借動隨出隨補流轉無窮追憶昔年截漕採荒發銀遠糴顆粒待輸於隔境生活寄命于他方積粟如積金留壹石之穀卽活三四人以百十城之生靈詎剩存些少之穀所能拯濟是發穀之說未可行於山東以山東荒多熟少穀未敢發也然而山東之穀不啻備東省之饑亦可以備遼左之饑臣爲將來之慮且請銀以預糴矣豈可將見存之穀反碾米以輸遼

乎萬一歲穀不登六十萬海運米豆何方糴買。何方
裝運。截漕則漕粟有限。遠糴則腳價無窮。且三十八
萬之穀。碾爲十八萬之米。此米可不脛而走。以歸蓋
套乎。抵遼腳價須得十餘萬兩。倉穀非盡貯沿海地
方。多由寫遠般運。迂迴道路。以至海濱內地。車腳又
須一二萬兩。碾穀運米之費。幾與糴買相當。此銀從
何措辦。東土與危遼相接。外有不時之警。民無終日
之儲。全藉倉穀以防緩急。故他省之穀止備荒。而東
省則兼以備兵。他省之穀止畱濟本地。而東省則兼
可濟遼。碾穀濟運。非長策也。再查東省錢糧例於隔

歲開徵今所徵者四十七年之額編也若將四十八年提起併徵則登萊之八厘爲一分六厘濟青東亮之九厘爲一分八厘一歲而徵五次之加編民力能堪此乎通查闔省糧額有一畝額徵三厘八絲及二厘九毫者今以原額三厘而加九厘則三倍矣二厘而加九厘則四倍半矣合四十七八年併徵則六倍而九倍之矣此令一行必無遺民卽忍心以行苛政徒斃民於挺必無完賦項據登州府推官孫昌齡揭報沿海之民全里全甲盡人逃竄臨岐痛哭沉于于池雉經於林卽有米逃非退地於賣主而不耕卽推

地於典主而不受民情既渙官法難施恐啞人之慘
近卽在目前揭竿之禍遠不在日後齊其有寧所乎
而三韓併受餒矣且以齊之窮年來義切同仇心厯
國恤丁壯抽矣帑藏括矣稅銀首先起解矣各官如
數捐助矣新兵集而歲餉猶虛其四牛隻買而價值
尚虧其全軍器盔甲整辦從新而件件皆由措處城
池堡堞修飾舉墜而般般勉自支持居平之用度每
從搏恤任內之資俸悉用扣存利孔已自無餘經費
萬分罔措奈何六十萬石之運偏任其煩勞而一畝
九厘之編不損乎毫末今又責拙婦以無米之炊窘

荒土以用三之法。夫此餉非齊之餉也。卽經略所急之遼餉也。遼急銀如疾風暴雨望而驚焉。遼急米乃以泥飯塗羹緩而應之。只恐遼左有銀。山東無米。十數萬之兵不能望海以呼庚。亦不能削金以充腹。誰實誤遼。而東人亦將有口矣。再念海內皆有加編而無海運。卽有海運而無東省六十萬之多。所謂加編者。末生于本。子生于母。未有原額二厘三厘。而加至九厘者。今欲移于上地。而上地已無可加。欲存此下地。而下地總入全額。墾土多而腴田少。山陂海磧磽确并邪之地。皆宜槩加編。地不能責其生金產銀。而

民乃代其椎肌剝髓。于是他州外縣有逃竄之流。民
林下池中。有慘亾之怨鬼。斯民也。即吾耕田給粟之
民。卽吾浮海領運之民。民逃民死。而可占運事之不
終矣。廟廊之上。必欲東人認六十萬之運。必不能
認一畝九厘之編。必欲與天下同認一畝九厘之編。
則請兩京十三省盡效東方之海運。然後東人萬
死不辭。而臣亦有辭于二東之百姓。不則混勞逸于
不分置。其苦于無辨。雨露有不到之鄉。而病痛有
獨偏之處。朝廷尚未棄遼。而先棄齊。齊敝而遼不
能存。其爲遼計亦左矣。至于海運。應用銀兩伏乞

勅下該部速查本省應解京邊銀兩儘數扣存或另
發別省銀兩克用仍照原題每歲發銀二三十萬凡
遇秋成有穀卽先期收買預備將來荒歉運完之日
總冊開銷其濟青登萊倉穀聽海運隨便借用仍留
穀本糴補輪流接運以戒非常儻以臣言爲然俯
念東人之苦亟議減編其糴運未敷銀數容臣等徑
自截留應解錢糧支應蓋今日千急萬急無如遼急
爲遼原以爲國題明之後臣不爲專擅計臣當亦
諒臣不得已之心矣○兵部黃嘉善奏報援遼兵數
自四十七年十一月至四十八年七月陸續出關通

十三萬三千九百四十九名將次出關一萬六千一百七十八名調募來報發者四萬八千

王在晉再請運價云今歲春曠無趁兼之海運括粟甚急民間突不得黔臣備述民艱疏入不報藉有天幸濟南東昌兗州三郡秋穀已升少補春收之歉間有被災若蒲臺鄒平萊蕪郯城沂費嶧等州縣臣諭所屬曰歲無全稔惟多方恤民民苟足存軍興孔亟勿以災聞也孰意登萊青三郡春麥無收夏災更甚初已苦旱已復苦霖積雨衝垣破堰平田立變陂塘山水激石流沙窪地頓成谿壑高密紅葉之蝗種雖

藉兩師以殄滅而沿海尺餘之水電又因風伯以括傷甚而烏雲黑颶震吼地之雷聲因之白粲黃粳成盪空之波浪大樹拔根曷問遭賜之殘粒生畜倒斃何有汜濫之浮苴民方度海以運軍糈歸而視其田里則板蕩矣廬墓則成沼矣養生送死之需一無所憑依矣如是而民安得不逃民逃而國賦何從出乎矧新編又倍昔而爲三也民逃而海運何從辦乎矧海運又倍昔而爲六也括瘠鹵之膏以充餉而天又靳其所生驅波濤之民以贍邊而國又窮其所存東作西成之失望而南箕北斗之空懸彼天下之

至苦者莫如遼人然遼人賊來則戰賊去則休而東人之牛馬負芻無休息也遼人暴骨沙塲遊覓有棲止而東人之納命大斲無棲止也加編則一例科派而與海內之樂土同輪抽括調募買犢則一律誅求而比各省之紛紜更甚六十萬石之糧不知銀於何出而欲責無米之炊六七八年之賦不度民之不堪而槩行束濕之令今日之斃斃無告莫甚于東民所爲如戴天之惟皇上之垂憐耳再查青登萊三郡原無漕糧無可改折而海運濟遼又以地鄰壤接義難推諉惟望皇上暫免災地之新編量減海運

之糧數至于本省民間積穀原以備荒非爲遼餉而設今沿海旣因海運借動而內地又轉運煩難該部有碾穀三十六萬石抵海運米十八萬石之議奪吾民口中之食救他人眼下之饑竊念遼左自有新編合天下以供遼奈何括荒地之儲益甚窮民之窘臣斷斷不能奉行伏乞分別災傷重輕災重者將新編遼餉暫從停免仍于海運數量行酌減倉穀存畱發賑免碾米濟運其海運錢糧不足令該部速覆臣前疏亟發價值俾運船立刻開洋運至益州交割則臣得藉手以救危遼而不負朝廷之委任矣

海運艱煩人不習海旣無舟楫又乏錢糧所以屢
疏瀆請此屬創行之事紀述宜詳以備東征之查
攷云

七月二十一日酉時

神宗顯皇帝晏駕

皇太子令旨賜經畧熊廷弼銀一百兩紵絲四表裏
總督文球銀一百兩紵絲二表裏巡撫周永春銀六
十兩紵絲二表裏巡按陳王庭銀四十兩紵絲一表
裏鎮守總兵兵備監軍餉司副叅遊都守禦把坐營
援遼等官各賞賚有差○遼東鎮舊額官軍八萬二

千三百七十七員名今調援官軍約計一十八萬共
二十六萬二千三百七十七員名除先發銀三十萬
次發銀一百萬今發銀三十萬兩六分克餉四分克
賞

庚申八月初一日

光宗貞皇帝登極 聖諭遼東奴酋叛逆戶部已加派
各省地畝錢糧今將礦稅盡行停止張燦馬堂胡賓
潘相丘雲俱撤回應用

王在晉奏災異傷舡云海道之險海運之難臣等累
疏言之不啻詳矣此非臣之私憂過計也攷之元史

至元二十八年海運漂米二十四萬九千六百有奇
至大二年漂米二十萬九千六百有奇無暇遠引卽
萬曆二十五六年東征海運飄風泊浪之報幾無虛
日臣檢查原卷大約什損其貳海之不可嘗試明矣
今馬頭嘴等一帶海口爲衆船灣泊之處原非極天
浩渺無涯無際之中而烏雲黑氣之冲霄異火閃光
之照夜擊馮夷之鼓則海聲驚灌耳之雷揚風后之
威則腥氣動潛鱗之鬪波浪壓帆檣之上而舟杭投
海窖之間取之則粒粒如珠而棄之則飄飄似葉浮
游逐浪誰從海上招覓變化爲魚信是人間劫數彼

艤灣泊岸之舟尚不禁風狂浪惡藉遇颶于汪洋大海舟楫其寧有片板榜人其寧有噍類哉臣一聞報循墻悚忭負罪倉皇轉念遼人果腹而東人填海果復者尚以爲勞而填海者孰憐其苦歸而耕田則三編立併流血于公庭出而浮海則一夕沉淪委命于大壑海若已收之鼎俎而長年其泣乎鴟夷嗟乎由海餉遼是以死藥而療生人者也其幸而得療也是取蛟龍灑瀝之餘分來以秣士馬者也先臣于湛有言厭河運之勞欲舉丘丈莊之策但計漂溺之米不計漂溺之人夫夫俱失從茲而各路之運官運卒鈔

然喪其魂魄矣。且是日之風，蕩搖海角，合抱之樹木立見傾摧，在野之牛羊半歸壓死，原田枯于久曠，已多不秀之苗，而枝幹倒于隨風，希有剩存之粒。文登、寧海、蓬萊、福山、四州縣皆然。至于青萊之被災業已具疏報聞于皇上矣。夫登萊青三郡海運出粟之地也，今三郡並報災傷，粟于何括？即用價于何召買？目下有萬分難處者，蓋起運本色必徵本地之所生，給價召買必買本地之所產，本地豐歉無常，然歲旱則傷高田，猶望窪地之稍收歲潦，則傷汗田，猶望高田之偶獲今登，苦旱矣，青萊苦潦矣，并高下之田盡

爲海颶所損傷矣。土人無食，何以濟遠人本方無米，何以供糴？買今歲東兗濟秋穀頗登，然濟南去登陸九百里，海路一千八百里，僅僅五州縣通海，而餘去海遠矣。登郡糴米于西，則價值甚費；西郡轉米于登，則車力甚繁；此搜粟之難也。至于黃黑荳損于秋旱，處處乾秕，通省無收，今遼陽甚苦缺荳，檄令東省所輸米豆相半，以它年所易糴者，而今歲獨難，以它方所有餘者，而東省獨膏人之所急，天故靳之，豐歉各隨其時，貴賤必因其地，此處缺豆，不得不通融以加派于產豆之方，故或多截漕糧以省東方腳價之繁。

重或派豆于永平淮津等處以補東方轉運之不足
是一策也或量減明年起運之數俟豐年徵解轉運
遼陽以補凶歲之缺額又一策也不然天不雨粟地
不生毛別無強括之術六十萬石之糧談何容易今
日不言而俟日後言之以誤遼軍之待食則臣罪益
無所逭而臣滋懼矣再查漂沒船糧當海運之初原
議意外損失准數開筭卽二十五六年海運失風糧
米題過另冊開銷彼駕船之人水濱不可問矣非
官爲銷笑誰爲代補乎

巡漕易應昌題稱淮南之海運三十萬不苦于糧而

苦于舡山東之六十萬。苦于舡而并苦于糧。以數千里之生靈試于風濤礁磧之中。國固有虞人誰無恐。謂天下之食足恃乎山東。報稱七月初七等日亥時羣龍爭鬪颶風大作傷舡一百十隻。泔歿水手五十四名。不知下落者一百七十五名。失去糧四萬四千九百二十六石。督餉侍郎李長庚報稱天津糧舡北岸于八月初三等遭風漂失二十一舡。南岸于七月初五等日漂損十舡。又于八月二十等日發舡三幫甫發而狂風大起。由蓋套回空淮沙等舡漂損一十六隻。由天津裝糧重舡漂損七隻。又據寧前道稟

稱漂來舡戶報登州運舡遭風者俱漂至寧前地方
又據寧前舡戶尹思等報芝蔴灣運舡遭風三隻漂
至天津止一隻見在隨接督臣書稱初九日南海口
裝完糧舡亦損四隻颶風異變海上舡隻一任縱橫
臣措躬無地何天之不助順若此耶又總漕王紀題
稱改造河舡四十隻新造千斛大舡五十隻及應天
山東運舡二十七隻于七八月間次第由海發行卒
然颶風驟起舟楫四散漂蕩七十六舡相繼化爲烏
有且無論數萬軍儲虛擲海底而數百無辜赤子頃
刻間尸填巨港此江淮間一大變也

光宗貞皇帝崩

于本年九月初一日賓天

泰昌元年

以八月起十二月止

本月邊餉御史萬崇德題遼東一歲約用本米二百餘萬石內運派過一百五十六萬石餉司單崇議請召賣米六十萬石今遼既旱荒無可召買召買行于順永保河及真定五府爲數已多今勢急燃眉無可爲計非再截漕米二十萬石貯于天津運抵遼陽萬萬不可乘今漕米到津便于截畱是在該部之速覆耳召買豆料隨地酌量其打造舡隻并祈天語申飭不得悠悠泄泄也

是時遼東石米四兩、石粟二兩、一石不及山東之四斗、

諭熊廷弼曰：逆奴犯順，特命爾調度戰守，相機征勦。暴露良苦，特賜銀幣，用彰恩施。○戶部查九邊十三鎮官兵暨總兵家丁，并召募新兵，共八十八萬五千。合犒銀一百萬兩。○先是黃克纘建議調南京浙江營兵至京募義烏沙兵赴遼，兵部初差司官繼遣，科道然皆營差，以便歸省。所過驛迤騷動，縉紳喜事謬稱某某可將，取人重賂，輒形薦牘。將多兵少，遊食之徒附會索詐，顧募市井壯丁，僉點孱弱，代更沿路脫。

逃以丐兒充頂究竟邊塞無兵而內地徒滋紛攘本
兵黃嘉善奏准各州縣招兵四十名里甲招兵一名
費銀三十兩獨東撫王在晉令州縣緩招其部臣尹
嘉賓所招新兵俱請畱本省防禦已發在途者撤回
山東免解兵之費亦免招兵之擾○遼東按臣陳王
庭劾東夷入犯諸將失事之罪廷弼言各官功過不
揜于是廷弼遂思謝事矣○御史舒崇都言遼事初
興起楊鎬于田間而以李如栢佐之非爲戰也本無
戰情彌縫衆議就中之微意旣不可以告人各路之
傳宣似有心于賣國鄭之范察處縣令貢緣入遼虐

佟鶴年致養性外叛以陷開原起劉國縉于贊畫糜
餉十有餘萬一朝脫逃宜乘此時一大創以洗從來
積玩○黃嘉善叅領兵都司袁大有兵逃提究御史
鄭宗周言不問李如栢之失機而問袁大有之故縱
何以賞一人而千萬人勸罰一人而千萬人懼哉
王大人等屯失事經畧與按臣奏報殺掠數目多寡
互異兵部清行再勘太常寺少卿姚宗文疏云六月
十二日之失事村屯一空焚掠甚慘丁壯歿于鋒鏑
童稚盡于燔燒主兵者不勝後慮借駁山城之案以
成此番叙功之舉則慷慨任事者不宜出此職往者

出關東閱見其兵馬不訓練將領不部署人心不附
戢不大入而大創小入而小創累疏已明言之至工
作之無時而已刑威之有時而窮廢群策羣力不足
以圖大功惟獨智獨賢不足以成大事蓋職所耿耿
隱憂正言巽言而不見入者閱差之不行舉薦誠不
敢以見聞真確者上欺 君父下誤天下蒼生耳豈
舉筆艱難而愛數行之墨哉如經臣能因此而憬然
悟嗚然改圖以不負 皇上下大賚之恩不虛海內征
輸之苦則桑榆可收矣

閱科之疏出而臺省之叅經畧者紛紛矣閱科以

此罷官且見排于輿論謂此疏發覺之遲耳第經臣之剛復負氣當易多用兵馬錢糧虛耗海內當易彼時虜勢甚強大臣督兵在外安能盡保村屯之無失以村屯之失而遽易經臣亦議人議事者之苛耳

九月初六日

熹宗愍皇帝登極

御史顧慥疏曰奴酋發難以來始則諱言于守而以戰爲輕嘗繼以失利于戰遂以守爲定局今日經臣之所從事戰耶守耶出關業已踰年戰守豈無定策

乃虜輒出輒利未聞我兵以一矢加遺臣前閱姚宗
文之疏謂六月失事焚掠太慘村屯一空專制閩外
胡匪不以聞昨見賀世賢塘報則僅斬一級獲一盛
奪四韃馬而遂張大其詞竭全宇以供一隅今年八
百萬明年八百萬安能歲歲而輸之臣恐財盡民窮
盜賊蜂起憂不在三韓而在蕭牆之內也○奴酋入
撫順大掠○袁應泰巡撫遼東○御史舒榮都劾原
任巡撫周永春奉旨永春功罪俟事完酌議
御史馮三元疏來廷弼精神不以籌邊而意氣偏以
角內才能不足勝敵而推扯用以覆短以殺爲威以

復拒諫人心不附方畧全無天下事已壞乃欲卸担而去之此可謂封疆之臣乎中外之人皆知其必誤遼事特懼其有阻撓之名而莫敢言也內言其無謀者八欺 君者三乞亟會議處分或令回籍或令聽勘速簡才望之臣往代保不爲地方憂奉 旨着九卿科道會議具奏○兵科楊漣疏云奴酋不長驅遂以爲素无大志我可安然無恙而不知吾之寨日劫也堡日空也人民日殺掠也馬畜日驅赶也我招獲之數不如喪敗之數樹無皮而不能生邊寨無屯堡人民馬畜而能存乎議經畧終難抹殺其功憐經畧

者亦難掩飾其咎。職所以不能爲廷弼諱也。○御史張修德言經臣大誤疆事重負國恩詭言謝病無人臣禮。○兵科薛鳳翔御史張至發佖合中俱有疏叅經畧于是廷弼稱病乞歸

戶科王繼曾謂廷弼掛衆議有三以嫚罵爲氣魄將帥不爲用不能成功一始初不能用遼人客兵蹂躪遼地遼人離心不能成功二動天下兵糜財浩費所過驛騷淫劫而北平山東最被苦楚人謠詠詠不能成功三至如樞臣黃嘉善當去三尺童子能知之不知輔臣畱之何故乞簡方畧大臣事尚可支也。○刑

科魏應嘉疏稱中府會議詢及經畧應代否衆皆曰
應代無疑以兵言之天下援兵約十三萬有奇遼東
土兵約九萬有奇而皆不足供其用以餉言之除
先帝所發三百萬外已用過八百餘萬猶曰餉不足
也如再遷延必爲數幾八百萬而後成功耶以軍資
言之年來買馬幾傾府庫而兵部委一萬有孚捐數
十萬金錢所買馬匹十不得其一用草料徒費馬又
殺傷有兵無馬何以應敵卽如前數十萬金火藥付
之一炬至其殺人如戲不殊屠伯該鎮共痛舉朝
共知以村屯言之花嶺王大人等處之殺擄陳王庭

纔一指實卽欲剗刃其胸猶曰半個遼陽亡而復存不知清撫開鉄之間所存何地所復何城何以謝三韓父老子弟而忍聞其野哭以道將言之道臣高出等皆係斟酌其才望以應遼急者總兵李懷信等皆係名將又爲廷弼所取用者乃于道臣一言不聽于大將罵之如奴人人憤鬱氣滿腔膾懷信不勝其挫辱決意求歸聞其入關一日一夜行三百餘里此爲有病乎抑萬不得已而然乎監軍御史勒令走角門如吏奉差遣如有司在御史固爲自失其體在廷弼何以悍然冥行至此也

先是給事中祝耀祖論本兵黃嘉善汶閣當機見搖首鼠猶豫債事病中膏肓李若珪論嘉善中實慣憤外復優優原無擔當之識力。但道勿事張皇原有畏避之私情。惟曰事難推手。屢失而屢不知懲。愈危而愈不知懼。楊漣論嘉善爲本兵一籌莫展。不知主領何事募兵跋扈行劫而逃。總付之不問。御史楊春茂論樞臣蒙面視事。猶然葫蘆舊樣。不見帷幄新猷。左光斗言有東事以來。樞臣誤國已非一事。閱科姚宗文論嘉善爲本兵議紛而愈不能決。事急而愈不能斷。熒惑兩岐。遷延時日至。是楊漣再論嘉善併前論。

經畧疏及馮三元張修德本俱奉

旨會議

楊漣奏接總兵李光榮報奴酋從會安堡連刀灣進入
入漢至瀋陽城北遊擊馮大梁報東夷自蒲河北漢
至大鶴等臺將原設撥夜趕散至城北三里橋方止
榆林舖等處精兵無數兵分兩路深入瀋陽旦夕存
亡莫必經畧廷弼或能力抗強虜保全孤城亦未可
知萬一瀋陽失守則遼陽危廣寧山海以西皆震驚
矣乞 勅九卿科道會議作速擬脩堪任經畧一二
人面諭推左右司馬一人共從長計禦虜援遼作何
處置無得仍前悠緩至斷送封疆而後已也○漣論

本兵黃嘉善八大罪比之爲象謂其昂然大物日但食廩侍班好看而他事事可憎也○發帑銀一百萬兩與戶部克餉別部不得分用星夜解赴遼陽交與熊廷弼酌量犒賞并前發一百萬兩解九邊兩項共給腳價五千兩不許騷擾驛遞

熊廷弼疏云遼師三路覆沒再陷開原職始驅羸卒數百人踉蹌出關至杏山而鐵嶺報失當是時河東士民謂遼必亡紛紛奪門而逃也文武官謂遼必亡各私備馬匹爲走計也各道謂遼必亡遣開原道韓原善分守道閻鳴泰往瀋皆不行而鳴泰且途哭而

返河西謂遼必亡議增海州三岔河戍爲廣寧門戶也關西謂遼必亡且畱自備而不肯轉餉也通國謂遼必亡不欲發軍罷火藥而恐再爲寇資也大小各衙門謂遼必亡恐賊遂至京師而晝夜搬家眷以私也中外諸臣謂遼必亡不議守山海都門則議戍海州爲遼陽退步戍金復爲山東塘牌也卽奴賊謂遼必亡而日日報遼陽坐殿以建都也其間倉惶之狀不能以旦夕待而今何以轉亡爲存地方安堵舉朝恬席而卧也此必非不操練不部署不撫輯專事工作而尚刑威者所能致也職到任西北兵馬付柴國

柱賀世賢李懷信守潘奉川兵付陳策防守所皮驛
土兵不願屬漢將付高出暫理同川兵貼防山西兵
付楊宗業存城操練真保兵付劉孔胤守遼城毛兵
與贇畫募兵改付胡嘉棟防鎮江寬襲凡援兵隨到
隨發可戰者發戰可守者發守與地方酌量緩急何
曾一處一兵不調停各道新陞職僅與高出邢慎言
周旋一城相與如腹心手足此外則以運糧事催海
蓋道班軍一二事駁寧前道遼陽城池坍塌人皆知
其難守紛紛私逃自挑濠築壩從十里外引水以護
其外幫修理外城自築梁口馬道門關以固其內向

之私逃而去者無不人人回城居住瀋奉之間向無
一人敢往亦因修築完固商民百貨輻輳道途日夜
不絕自斬貪懦陳倫劉遇節王文鼎後復拏問鎮江
遊擊戴光裕細打迭獄隨以病斃舊開原道募兵皆
關內多叛出邊外一時陸續斬十三餘人近海蓋道
獲其逆于南衛劫盜人財者十二人亦駢斬之又一
起十六人逃出邊爲長勇堡李國臣追獲十四人而
逸其二職令俱斬之該道意不無少望前于京中忽
得一單言五六月間奴賊搶掠屯堡三百餘處殺擄
軍民近二十萬又被賊衆逼赴四五萬人且謂職失

接臣塵報堵截以爲天理人心安在世道如此欲大
臣立功于外其可幾乎○又云凡用兵將官得力方
能濟事今總兵中惟賀世賢畧短取長敢于戰陣候
世祿精悍而初臨大敵劉孔胤善收拾城守行伍而
戰陣非長將官惟尤世功朱萬良等爲軍白眉餘爰
庸庸碌碌求大將如前日劉綎輩諸將梁貴徐九思
輩已不可得各鎮兵馬四五等選之餘無一非敗羣
下駟者謂援兵陸續出關必一一可戰而不能戰以
爲經畧罪而抑知兵馬之不能戰一至此極也
熊廷弼乞賜罷斥勘問疏曰頃臺省諸臣顧慙等交

章論職職病甚有應有不應而臺臣馮三元辨言欺君庸才誤國一疏數職八無謀三欺君之罪云不罷職而遼之存亡未可知也是職留而遼必亡職罷而遼必存計朝廷之上急急欲存遼必急急議罷職而不待言矣。惟是無謀之罪職願承欺君之罪職不敢承。請姑棄一言而毋嗔職怒人不怒虜也。去秋開鉄委弃糧苗田禾職抵遼陽卽行各總兵卒收割如不能則焚之又遣中軍官往諭數次而總兵李如楨李光榮賀世賢柴國柱等竟不欲往職爲此憤恨屢見之疏牘而馮三元未及見也。石礮研起火星延燒

火藥六月陷開元七月陷鉄嶺八月陷屯關職以是
月至遼陽牌行開原道韓原善駐藩彈壓屢失按院
道屬職勿令行北關報至藩官軍一呼而散亟遣分
守道閻鳴泰往撫之至虎皮駟大哭而返是時止此
兩道而馮三元言道臣欲以一二萬衆應援金白而
職不能用也不知道臣屬誰况職以初三日到遼二
十一日北關陷無論此時無兵兵卽有而相去五百
餘里應援何能猝到且鉄嶺不能援而侈言援北關
此道臣欺三元者過也修守開原是要着任諸臣千
言萬語職所爲不錯然所役軍皆其守城不能戰者

如柴賀李三帥人馬實未做工卽貼修潘奉亦其步
軍乃各帥自爲營盤戰守計非軍自做而誰與做若
云不惟敵自求而守之專事則令箭之催馬上之催
亦惟敵是求矣潘陽王大人之役實係堵截徒以無
斬獲功証爲獎借語然以數萬賊平平妥妥而去亦
是難事若吹索太過必盡失監軍道與總兵將官心
近邊五六十里之野不必待職清自清撫陷後所在
檢拾而賊爲我清久矣遼人與賊習除稍能過活者
盡搬移外惟一二無依窮民仍依舊巢抵死不去曰
我搬在別處無過活亦死在此亦死賊來且隨之而

去卽屢清之而不得也贊畫新兵欲回家過年一日而逃二千人王平胡國臣所領新兵乃贊畫疏稱練成一枝勁兵爲高麗奴酋所驚畏者王平統兵一千七百餘兵自言挑選可得五百人像一當軍模樣胡國臣步兵二千扎營聞江湖聲作賊至而奔潰微三元言而職不知遠人可用也東山參礦徒趨利則有應兵則無人去冬已牌行劉國縉及原任推官陳光裕給與游都備中千把扎付張紹募一番往返三月僅抄一沿門冊回報而竟不見團練一人何故微三元言而職不知礦兵可用也職不識秦楚事且聞近

年征倭征播用兵幾何查平播用兵二十餘萬人今
奴酋視播何勢何地而評職用多也謂職無謀職當
承五月間兩監軍道一駐瀋陽一往奉集按臣又因
職請往蓋套催糧獨職一人卧病遼人屢催合救遼
人命否請問朝廷要遼東否情出危迫豈敢要挾
無人臣禮而謂職欺君不敢承也遼道自八月以前
實止監軍兩道且各有分駐亦不得一時嘗聚海蓋
道以二人而辨百萬餉運寧前道以一人而辨造舡
鑄錢諸務馮三元不欲聽職自裁請去職以存遼而
各部大臣欲聽職辭裁姑留職以平遼也豈可哉伏

乞皇上將職罷斥行勘亟簡才望大臣星夜前來
代職職已不能批發文移惟一面知會將整衆待敵
如馮三元所云保救殘遼急宜如此而不必遲回須
臾者也○廷弼又有行勘尚屬虛文之疏上曰科
道魏應嘉馮三元張修德與經畧熊廷弼屢次互相
奏擾若不速勘無以明罪就着魏應嘉等前往遼鎮
會同彼處撫按勘明從實具奏○楊漣疏云遼東之
事卽勘以言遼事之人畢竟各不相下反滋多口成
何政體力請收回成命○御史吳應琦奏勘官必須
另遣勘之而實罪屬欺隱廷弼自當其事卽勘之而

不實事屬風聞三臣亦不任其咎科道之中饒有風力者自不乏人各舉其一單車過往即可了此一段公案矣

戶科張國祥上言熊廷弼經畧遼左修築開濬鼓舞堵截是其一得。未可盡以爲非。借使調無用之兵靡難處之餉不至疲敝閭左以爲根本憂遲之數年未能成功于勦。亦可取效于禦。惜其志大才疎氣高量褊諸臣論列業無剩義奉旨行勘無庸再贅矣。惟是臣所慮者經畧更易之時。乃敵人乘釁之際。三臣並出。冠蓋絡繹。文移旁午。聚族而喧囂者。是何奇正

之策母乃懈軍士而長寇志乎。說者謂功罪不可不明。據臣愚見此時喫緊。惟敵是求。卽藉九廟威靈。削平有日。不惟廷弼可從寬宥。卽楊鎬何妨末減。不然而蕩定無期。變生意外。不惟當局者莫逃誤國之罪。卽旁觀者俱有胥溺之憂。柰何于危難之場作此擾攘之舉也。

議論持平且得大體

吏部尚書周嘉謨等會同九卿科道會議得經畧遼東熊廷弼當三路敗衄以聽勘御史起今官授之尚方錫之金幣其沐國家之寵遇不可謂不隆矣。單

騎辭家不避艱險至于躬親舂鍤形神俱瘁其拮据于遼左者不可謂不苦矣。撐持一年瀋遼幸而無恙。其守亦幾固而力亦既竭矣。惟是人言嘖嘖率謂氣岸高而沉識寡。臨集思而好自用。經年工作未聞簡練之精。中原驛騷無抹城堡之陷。科臣相繼論列豈盡無據而云然。第事在彼中非得于勘議之確。何以定功罪之案。故謂廷弼爲有功于遼者。功難倖獵臣等不敢懸料也。卽謂廷弼爲有罪于遼者。罪須實據臣等亦不敢懸料也。今廷臣會集俱謂封疆事重烽火勢急且廷弼之以病告者屢矣。據稱衄血嘔血

大瀉大痢肌肉消脫熱煖如火跌在公座昏暈不省
僅僕門書環守大哭則其病狀之狼狽亦可想見卽
人或議其借病卸捏而其計無復之之光景又可想
見况強敵壓境聲報狎至此何等時也尚聽其悠悠
卧理以遼爲孤注耶急應議代以重危彊其有無功
罪總聽兵部轉行巡按從公勘議具奏定奪至于堪
任經畧重担之仔肩不易殘局之收拾尤難必有異
才而濟以識必有沉思而運以機必諳練精熟神思
周到而又虛心下士使人各得盡其情畢其策而又
就近轉移方無遠水近火之慮且人情矢口易着身

便難人才揆望易課實則難楊鎬既已僨轅廷弼復
無成效天下事尚堪再誤耶該臣先期發單各舉所
知是日會議又互相讐難互相扣問業有成議此則
候另日會推者也若夫添設兵部左右侍郎各一員
平時可脩帷中之運籌有事可爲經督之後勁先臣
高拱建議委屬老成長慮今值多事之秋更宜預商
會議僉同無煩再計候臣部另行會推請 旨遵行
又會議得逆奴匪茹東事方棘所藉居中幄幄之笑
正殷當此而議樞臣之去誠不宜輕第樞臣屢疏乞
身情詞懇切所不卽去者或以遼左未平尚欲效借

審之籌亦以山陵未畢未忍離執紼之役抑或
明旨切責不敢乖賜玦之義然而樞臣之當去此樞
臣之久自決也。謂樞臣爲當去。又輿情之久爲樞臣
決也。矧邊事益急非中樞卧病之日人言紛至無復
出就列之理似應 予告以全晚節但大臣去留應
俟自行陳乞取自 聖裁非臣等所敢擅擬也

十月初二日異風揚沙登州晝晦三日水怪晝行海
上又招遠鄉民家生猪一首八足是日會推經畧○
以袁應泰經畧遼東○薛國用陞巡撫

熊廷弼與袁應泰交代上疏列人民城堡兵馬錢糧

伏械一一交有數并言自丁家泊斬捕而抄花不入
犯自長勇臺撫而煖兔不復交通去秋九月奴言欲
犯遼陽自瀋奉修兵備而奴返老寨諸夷子返新寨
合力拒守其大畧也年來裁巡撫添巡撫起贊畫用
閱科議督護何莫非臺省所建何嘗有一效地方此
後文墨不省議論不寬則經畧必無所措手足臣爲
國家慮矣○兵科朱童蒙往遼東會勘延弼功罪○
南道李希孔諭姚宗文閱視奸狀以夷攻夷之策並
無要領四千金浪擲之虜穴劉國縉事事決裂而挺
身護之周永春紛紛冒破而卮言褒誨荷戈士二十

萬一日而閱畢太常非論列之時前此在閱孰禁不言前此所閱何事失事始禍之李維翰不逮抱頭鼠竄之汪可受不削今再置宗文不問尤而效之誰爲國家任勞怨哉

王在晉題全遼性命關于一線之海道故防遼者以保全運道爲第一着以奴之強久不敢東向而窺登海者豈以虜不習舟乎烏龍江之造船見于遼報非臣之浪說也豈以地險不能進兵乎臣已令巡海道差官偵其地里繪其山川非真不可直達也當東兵三調之後處處存一空營民間一日數驚思避兵竄

竄臣不得已屢疏瀆 請畱得新兵九千分散各路
然皆田野荷菴之民也不能蹈海臣又不得已屢乞
水兵該部三議調而三易其地不能得一水師臣計
無所措檄道備安家行糧自往浙直召募水兵一千
六十六名精銳憤出入海洋捕舵目兵共五百四十
七名到營操練造舟楫製火器葺墩臺整戎械列陣
有衝鋒之甲冑揚旌有出海之艤艫登州二百年來
未嘗有此軍容氣色藉令如防倭時再添兵二萬四
布犄角橫截島嶼奴如犯海定使之納命海中斬奴
酋之頭臨李永芳之肉以雪 國耻此臣安排措置

神

之大畧也。如中間謀無地不有其不敢興渡海之謀
爲絕糧之計。亦此間聊有兵革預設以銷其萌。然則
東省之養兵豈直爲山東保封域。乃爲遼東守倉廩
而保其養命之原也。敖倉之粟不據。則成臯之險不
固。事之不煩再計者。臣因新兵無餉具疏懇請
神宗皇帝于四十七年歲除之夜。傳旨允畱臨清六
郡稅銀五萬兩。香稅二萬兩。以充兵餉。夫臨清等稅
係進內錢糧。此二十年來所不易得之旨。而臣
幸得之。微臣何能感格天心。亦聖明知東省不
可無兵。兵不可無餉。又知東省隣遼。畱兵以固齊。可

以護持遼餉耳。先皇帝登極。詔罷各路抽稅。凡鄉閭市井一聞。詔音靡不泣下。喜出向隅。臣卽廣播。皇仁令臨清六郡盡行罷榷矣。此五萬兵餉。旣無所出。臣不獲不請。留新餉。乃戶部謂新餉之不可留也。議扣民壯工食以充之。夫九千兵之餉所費不貲。豈民壯所能分食。以使之無餒者。矧本省團操民壯。卽爲民兵。此外聽差民壯。幾何工食。幾何而可當九千兵之餉哉。半饑半飽之民壯。旣不可以緝盜賊。無衣無食之新兵。又不能以守地方。此兩廢之道也。又云如抽扣不足。則以無礙搜括等項佐之。夫糧

非額編焉能復有存剩東省年來洊饒額編之數什
虧其三。無額之銀百無其一。矧扣除民壯工食及搜
括無礙等項。見准部文。克東克買牛之費。抽扣不足
而搜括繼之。搜括不足而設處繼之。設處不足而勸
助于民。蠲助于官者。又繼之。今且虛二千九百餘兩
未補。牛盡而財與之俱盡。臣疏在 御前可查也。四
十七人兩年已經押扣搜括辦遼左之車牛。安得復
有工食無礙等項。佐本省養兵之費哉。兵以防寇也。
兵無食。卽爲寇。而其害甚于寇。寇尚有兵以禦之。兵
爲寇。而地方無可禦矣。兵易聚而難散。散則有獸奔

之患。又易散而難卽聚。聚則有烏合之形。遼兵無食。虞其脫巾。豈齊地之兵不能爲脫巾之事乎。遼兵脫巾固爲可慮。豈齊兵脫巾不足慮乎。戶部不肯留新編臣。豈不諒其無已之心。然齊之蓄兵。總爲防遼而設。與他省自是不同。臣以無錢空手。左揮欲發。無價之米豆。以濟遼左之急。右揮欲索。不編之兵餉。以充營伍之腹。卽朝習點石爲金之法。夜習神輸鬼運之方。亦不能取必。此責臣以所難。而臣必不敢緣旦夕之卸肩。因循以釀變。從來兵餉起于田畝。乃爲長久之計。今齊地三編民命殆盡。額外必無可加。齊地之

稅未有不先養齊地之兵。而獨急遼人之餉者也。儻戶部必不容臣扣留。臣請將完全無缺陷之三齊交還。陛下勢必銷齊地招養之兵。停登萊海運之粟。如旣欲餉遼。又欲固齊。則此九千兵之外。臣尚思請益。而此九千兵之餉。可不爲地方一區處乎。奉聖旨。戶部知道。該戶部議覆。准留事例。贓罰折蠟抽扣等項。仍清查工食以應扣。五分之數抵餉。如不足。酌議量留加派。

兵部尚書黃嘉善罷

王在晉陞兵部左侍郎張經世右侍郎着作速前來

協贊部務○以刑部尚書黃克纘暫署兵部併協理
戎政○經畧袁應泰奏薦原任寧前道察處不謹叅
政張國儒可當撫順一路原任吏部爲民郎中趙邦
清堪爲遼東監軍以崔景榮爲兵部尚書

十一月熊經畧與閩科姚宗文書去秋八月初到每
奏報必送書揭回札或有商量者查來書多言訪問
金白子姓稍力意急欲取一旨而愚不能會用夷一
舉地方屢求虎酋不理及差取別鎮往愬營講事竊
恐遊擊命官一有他虞動關國體不敢不忠言商
榷何意遂逆尊指致以擅遣屑屑是辨雖日後無從

下手平白送四千金與虜結訪問局而徒惹夷使一場之侮辱必思當日言爲不謬而出關乘興之初不宜直遽以阻其趨此不侵之罪也○熊廷弼揭開原道韓原善新募兵馬多賭博棍徒响馬猾賊成群脫逃全不開報是時兵已逃過二三百名馬已死過五六百匹而疏中混云招過兵馬一萬九千員名匹混在一處劉贊畫兵雖逃猶逃歸種田而該道兵不逃出邊外則逃入南衛刼截財物其安家銀自招自算不肯自求其清楚蓋該道心術險深操行曖昧職不能復存厚道矣○兵科韋蕃奏遼右喪師首罪未議

奏李維翰①御史王夢蛟奏撫臣失事之勘難緩奏
李維翰周永春②賀世賢舛望稱功揭云入秋以來
無日不傳烽無時不介馬奔馳戰陣斬獲前後六百
餘級賞猶有待黃河之清可俟職之苦海難脫援遼
總兵強半以病去矣獨職以不明不白之身居不進
不退之地職力竭矣遍身病矣功罪何居惟大昭公
道幸甚③越按御史申廷謨題自奴酋發難以來殘
破北關朝廷以興滅繼絕之仁寓聯絡羈縻之意
是以有優恤北關安姓四千兩之賞以恤虎慙鬼之
憂不過恐其滋蔓聯結其患乃大率之性惟利是視

忽有四千兩長賞三千人進貢之望。王猷以細人浪
于利子餌而輕許。致彼中以虛詞爲口血。去歲桃
林口有講說至再之事。附近諸虜效而尤之。其又何
弭焉。御史李應薦疏云。西虜聚衆挾賞。情形叵測。
收彼降夷。因致藉口。恤其女姓。更啟釁端。三千人入
貢。是爲何心。許三千人入貢。是爲何策。王猷之首。必
不可恤。虎酋之欲。必不可徇。桃林之路。必不可通也。
兵科蕭基疏。西虜生心。屢年之款。市結之而不足。王
猷之詐許。挑之而益開。張汝觀等四人之拘留。作何
結束。四千兩例金。三千人入貢之約。作何彌縫。今日

索降夷則黃把都兒犯搶之詞再至矣明日問殺命則乃蠻台吉等慢褻之語紛來矣蠢動之思觀彙而發斬王猷首懸之藁竿以斷其藉口之萌此保薊之全着也○基又叅宗文失策者三冒罪者五○刑科毛士龍疏薊門之禍自姚宗文用王猷之詐以歲幣餌狼貪以入貢開邊釁致桃林引路西都爲騷則薊門一帶岌岌不減遼東矣○南道王允成疏西平入犯王猷出使功不足以贖罪虎酋浪索諸虜紛講新賞是則專管西虜之明效大驗也又何言哉

宗文與虜四千金虜不以爲恩反索賞挑釁直至

在晉爲經畧力拒之威惕之講款多時嚴爲杜絕
薊門之禍乃已事載款虜疏中

十二月經畧袁應泰題奴酋初發難也始于撫順蓋
撫順爲奴酋出入經由之處是必爭之地奴酋以撫
順教場爲屯兵之處如坐通衢所陷清河開鉄延袤
三百里殺擄官兵軍民數十萬而我叛賊李永芳佟
養性等日夜引導籌畫爲陷陣封侯王之舉今奴且
威脇朝鮮而特圍獵于開鉄汎懿之境矣職會督臣
文球撫臣薛國用按臣陳王庭并道將諸臣問曰今
日計將安出諸臣皆曰宜復撫順清河職曰宜用兵

幾何諸臣口有原議十八萬之數在用大將幾員皆曰撫順六員清河三員寬叟一員職以爲說皆是議于撫順用監軍道高出張慎言總兵官賀世賢李秉誠張良策又以尤世功充總兵官朱萬良將騎陳良策童仲揆將步各一萬清河用監軍道牛維曜總兵官侯世祿副總兵梁仲善并見調姜弼各行總兵官事內侯世祿姜弼將騎梁仲善并將步各一萬寬叟用金復道胡嘉棟副總兵官劉光祚行總兵官事將步兵九千騎兵四千并見調水兵七千共二萬外以守遼陽總兵官劉孔胤統之尚少一員于續到副將

內選委以一萬守瀋陽一萬守蒲河以七千守奉集
兵將尚缺若蒲河爲撫順後應爲三岔兒要衝且兼
西虜況已殘破提兵應援非良將不可查得甘肅總
兵祁秉忠智勇兼資威名夙著且多蓄健卒應調守
蒲河而瀋陽奉集亦于續到援將內選委蓋大帥自
李懷信柴國柱去後止寥寥數人且其中更有在應
汰之列者故不免矜提肘露若此不得不調祁秉忠
以濟急需外備兵一二萬爲臨時調遣之用奴若攻
撫順之師我堅壁相持而清河寬輟出銳師以搗其
舊塞奴若北出三岔兒蒲河之師且戰守而撫順搗

其新塞奴若南赴清河寬輟我撫順之師直搗新塞而蒲河隨爲后援至臨敵出奇招降用間未可先定若是而撫順清河可復也撫清復而撫清之內屯堡皆復民間之稼穡終不爲虜資隨卽相地築城且急議屯田于撫清一帶以充軍實然此言之似易而行之甚難抗屢勝之敵而奪必爭之地則難于進處孤危之城而爲久住之計則難于守此二難者臣任之若夫兵馬不足而征調不應于手則戰難錢糧缺乏而轉輸不及時則勝難此二難者廟堂任之兵馬錢糧足而戰不能用請治臣之罪若兵馬不足錢糧

乏則臣不敢以三軍爲嘗試

國家爲徵幸也蓋奴

酋舉動視馬力強弱其馬弱惟在春初我之乘時斷

宜在春而兵馬錢糧須齊集于二月之前過此而奴

不可復制雖極力支吾不過成一年之局 國家之

憂之擾之費亦何時而止乎其文武將士能守撫清

至歲終無失事者鎮道而下宜破格升賞其戰卒雖

比往時戍開鐵者勞險更倍而亦止照其例撫順月

糧一兩八錢清河一兩六錢以示鼓舞大約能戰而

後能守能守而後能戰惟祈計出萬全而已耳

御史潘士良云經臣袁應泰誓不生還欲逼奴寨城

撫順而軍也。豈非慷慨任事之壯志哉。第議城則我必守。我守則奴必爭。奴爭則勢必戰。據經臣所定之局。是戰局也。而度經臣所處之勢。非處能戰之勢也。年來水陸二運。問舟楫于水濱。斃馬牛于道路。不啻三十鍾而致一石矣。向第運至遼陽而止。今議增撫順。又增三百里之遙矣。餉臣稱經畧。容取小車八千五百餘輛。推車夫一萬七千一百五十餘名。每歲用銀三十餘萬兩。欲加派于前。派牛騾地方民生之困。憊極矣。故城撫順要着也。凡要害必屯重兵。但地太曠。則難分守。兵太遠。則難在援。腹背受敵。兵家所忌。

况奴酋最狡善用奸細我之動靜無不悉知安肯專意退守聽我修築乎

勘科朱童蒙疏臣入遼便欲城撫順然撫順當城亦必不能卽城撫順去奴新寨約二十里去瀋奉約九十里我兵城此倘奴出鉄騎截斷來路無論糧草不通卽應援亦絕是斷送若干人也須以漸而進乃有成績一鼓而收全功矣

禮科王志道疏云奴酋掠金帛則有餘掠鹽粟則不足貂參無所市則貨絕投降無所處則人飢山地磽确則耕種荒干戈屢興則士馬倦數年之後可不戰

而服也。乃其要尤在于勿責近功。勿矜一逞。苟非虜騎。踰入相機截殺。願十年勿言戰可矣。職嘗言國家受病。止爲八個字論。人才則分門別戶論。遼事則犁庭掃穴。張虛聲則聳而聽之。語實事則談而厭之。遼禍幾乎不可救藥。皆不問兵馬輕重。言戰之易也。然則進城撫順。豈非石畫。職切以爲未可耳。

辛酉 天啟元年

正月發內帑五十萬付經畧給散官軍

二月初三日日暈甚異

經畧袁應泰奏昨奴酋以數萬騎圍奉集。自以爲敵

無不克乃監軍道高出鎮定調度神色不變睨視佩
刀卽有意外引以自裁挺然義不受辱虎皮驛兵將
赴援揚塵大起奴遂引去所謂人有必死之心已足
微一班矣

勅科
覆奏

兵科朱童蒙勘遼東竣據實回奏一某處被賊殺擄
爲失事某處堵戰修守爲有功勘得熊廷弼自萬曆
四十七年八月到任至泰昌元年十月內解任其間
奴賊入犯四十八年五月十八日子花嶺等山城六
月十二日子王大人屯等一十九屯八月二十一日
于蒲河等處其被賊殺擄者共二十三處皆爲失事

至于蒲河灰山豹冲斬級二百有奇所獲馬牛稱是
雖不可以言功而亦以堵截用戰者也遼陽之城環
匝二十里年久頽塌當開鉄初陷遼陽之人束裝思
徙者以城不足爲憑也廷弼葺其外築其內繞掘兩
河引水建閘城之上下密布火車火器分兵防守稽
閒襍絕奸細心思之巧經營之周有木人所不能到
者至瀋陽奉集虎皮驛大小三城修工如是守具亦
復如是此其修守之可言者也一某事爲從實奏聞
其某事爲欺隱未報勘得疆場之事凡有查核經臣
通監軍道之開報監軍道憲府廳之開報亦或有據

塘報卽入疏中者向來章奏似亦從實而無欺隱但其所報殺擄名口間與撫臣所奏稍有異同耳一城堡有無殘破村屯有無搶掠勘得藩奉之外凡有村落因山爲居塚石爲垣故曰屯曰寨曰山城其實民居不過一二家三五家而爲城堡者止有蒲河一處耳至花嶺山城禿老婆山城許毛子山城四十戶屯金剛屯金得成屯旱生屯李二金寨李沙包屯王大屯右廟兒屯劉替屯蘆尖屯白官人屯劉三屯頭目瓦溝子屯終弓二屯新屯趙官人庄沈塞雙樹屯皆其前後搶掠之村屯也一士民殺擄幾計罷城損

失幾何勘得三次入犯殺擄屯民七百二十三名口
被傷十一名口被擄脫回四名擄去民馬五十四名
牛一百二十一隻驢十七頭燒燬房屋八十五間山
口窖二十九處此殺擄之的數也器械則失損盔甲等項一百三十四件槍袍一十四領一兵馬折傷若干現存若干勘得前後陣失折官兵共五百八十七
員名被傷兵丁共三百零七名陣失馬一千五百六
匹現在支新餉主客官兵一十六萬三千二百四十
二員名寨馬六萬五千九百六十一匹共錢糧實用
若干虛冒若干勘得自萬曆四十七年八月起至泰

昌元年十月十五日止存庫續收銀七百七十四萬二千九百兩五錢九分八厘除收過銀九千九百七十五兩一錢三分存庫銀七十四萬五千一百六十六兩四錢六分其三應出入悉經餉司與糧官收支廷弼原不經手故有頂名虛冒乃各營將佐影占之弊亦嚴爲查處而不之縱也臣謹叅勘得經畧熊廷弼有揮霍之雄才有沉毅之雅度極其全力固能擔人之所不能擔騁其偏鋒亦有忍人之所最不忍任事纔十餘月耳而遼陽之頽城如新喪膽之人復定至奉集瀋陽三空城今且儼然重鎮矣之乎今而民

安于居賈安于市商旅紛紛于途而後之人因之以
爲進戰退守之地臣入遼陽官民士庶垂泣而思遮
道而代之鳴調數萬生靈皆廷弼一城之所畱是精
力悉經于此而其得謗亦先于此也唯是致辯殺擄
一節嘵嘵于有花名無花名之說以爭多寡獨不思
遼疆凡有殺擄律令但論失事不計數目當日廷弼
所漏雖未必都中所傳爲萬爲千而卽其所報亦非
的數廷弼明知而敢自爲隱匿是欺誑也不知而爲
人所蒙蔽是聾瞶也廷弼必居一于此矣惡得云無
罪乎臣愚則以爲廷弼尤有大罪焉夫封疆之臣與

諸臣不同尚方之授金幣之錫與委任諸臣亦不同
廷弼受皇祖破格之遇卽捐其頂踵誓以死報尤
不足答萬分之一乃蒲河之役廷弼知賊志在攻瀋
策馬而趨以救北門何其壯也至則諸將被衝不欲
再戰威之以殺而亦不前廷弼見官兵之怯弱如此
已料後事無可成始灰心卸擔故借微恙乞骸以歸
耳奴賊未滅何以身爲廷弼將置君恩于何地乎
忠臣必不如是是則罪之大者也然而廷弼之罪又
自其任性致之何也廷弼性甚急切而遼人素習怠
緩性不憲則工不完工不完則無可恃以爲守况非

常之原黎民駭焉凡借磚于鄰居採木于園林移石于墳墓似乎爭民施奪其甚者督工修築刻期責報鄉紳青衿役無割免又網打各弁斥逐諸臣能無騰謗聲乎所以流言載道形容過實諸言官得之風聞臚傳入告而陳于君父也然皆激于上爲國家慮周疆土而以大義期廷弼耳及至廷弼勝氣相加屢疏致辯旣而一揭出一揭應愈出愈乖終成罵詈非所以待言官亦非大臣所以自待也總之廷弼功在存遠微勞雖有可紀罪在負君大義實無所逃此則勅諭所謂罪浮于功者矣奉

聖旨這遼事會勘已明熊廷弼力保危城功不可泯
因言求去奉旨回藉情有可原今中外多事用人方
急該部仍議及時起用以爲勞臣任事者勸

經畧袁應泰條奏兵馬錢糧器械將吏應援太緩急
則搶地呼天或觸時而傷諱緩則翻陰覆陽且顧後
而瞻前臣雖藏三牙叻三足徒嘆曲高靡和獨拍无
聲也 廟廊之上勿先立一膠柱之見而謂奴不可
與爭臣前所請可以遲應一着差池噬臍何及逗遛
三年如金冠王表逮繫正法退縮奸狡如張超黜革
永不叙用王錫斧臣等提寃庶人情少肅可鼓後來

耳

吳金祖的名劉光先又名吳太真以叛卒倡妖言惑衆揭竿而聚者不下千人掠子女燒民房奪牛羊車輜岫巖一帶大遭荼毒且十營土口自稱真命執紅白標旗爲亂殺蓋州備禦營中軍秦顯忠把總胡靜岫巖備禦營把總張懋誠陣失軍士馬匹議者以海運入自蓋套陸運起自海州咽喉要地旣當絕賊奔奴之路又當防奴乘變之攻皆要着也時鎮守李光榮與麻承宣寶承武黃璽同知張文達會議于二十七日分營圍山次日四面齊進至二十九日李鎮守

在南谷口正分派間而北谷口忽報賊出坐營童毓
秀迎擊被賊斫傷衆皆却走賊追趕過河遊擊高中
選叅將胡國臣復回迎戰國臣中傷大衆混殺李鎮
守急率叅將黃璽帶領兵丁合戰于是本鎮內丁守
備等官吳登雲等十餘員領兵奮進不避矢石一擁
上山銃砲齊打賊不能支遂奔回窠大兵遂入峪內
竇麻同王化溥等又從南谷口進焚其頂而賊平矣
大勢約五百餘人割首級者十之二三騰山投水者
十之七八吳太真羅守忠俱歿兵中
遼撫薛國用劾諸將疏曰奴之深入瀋奉肆然無忌

良繇我之指揮者習蒙蔽爲故智以掩飾爲長謀烽
燧每每不明偵探常常爽失故或醉夢終日而一籌
之莫展或倉皇失措而站立之不定或虛僞恃氣而
觀望爲之前是以來則不知進則不敵去則不追
甚且張鋪蒲紙掩罪爲功任其大入大利小入小利
而曾不能一創也奉集失事李秉誠匿不以聞朱萬
良聞警赴援引賊深入賀世賢尤世功爭質虎皮擁
衆自衛以大將之巨擘反善爲奴描寫而張其勢可
不嚴爲處分以爲退縮之戒耶

薛國用題遼陽王客軍兵踰十六萬馬踰六萬所需

糧料芻藁爲數不貲其海運者由益套上岸其陸運者由高嶺發載俱輓而之遼陽且至奉集達瀋陽及威寧等處近者五六十里遠者千餘里皆用牛服載需人牽輓原派牛車三萬餘輛用夫六萬餘名額軍不足搜及民間牛騾牛騾不足又計戶抽丁以佐之名曰糧差夫銀差夫夫役不足復僉舍餘併士紳供丁以益之初不過借役一時乃一經派運釋肩無期祁寒暑雨不得偷一日之安又所領之牛率多倒死一面雇工一面罪賠至再至三賣兒鬻婦凶年飢歲芻桂豆珠每人每牛月計糧料割身之肉啖牛之腹

中人不免破產貧者鬻身以償以故擬及合戶累及親族計無復之惟有逃與縊耳近日妖民吳金祖倡亂遂以此挑激而號召之無知小民困于運役爲其所愚惑而向應者不少則因運差之苦而思逸逃者尚慮實煩有徒矣

袁應泰題職甫侍罪遼撫日夜思制夷之方無如招降爲最隨牌行河東各道以招撫降夷而河西不與焉在遼如總兵官賀世賢尤世功李秉誠侯世祿行總兵事朱萬良姜弼此六人者各將兵萬人而又素善撫夷丁能得其効力故令各收壯夷丁一千名分

配各隊是每漢丁五十人夷丁五六人也內有形迹可疑不便入營者則又持委原任總兵麻承恩加衛遊擊王世忠備禦朱梅統領關防察其無他可用以戰方始發各營此職安插之法也查降夷內東夷纔三百餘人西夷則五千四百餘人矣職讀漢書霍去病降匈奴渾邪王數萬自是匈奴遂斬右臂後趙克國擊先零亦以招降卒使先零瓦解遼自開鉄淪沒之後虜自十方寺等處投入奴寨至則納之今虜過遼瀋者則投遼瀋而近開鉄者猶投奴寨若遼瀋不收能保其不盡由開鉄歸奴乎至養夷錢糧亦有可

得而言者援遼初議十八萬今措餉如此之艱何敢
堅執成言因與各道議但以十六萬爲準見調家丁
乃見收夷丁總在十六萬援兵餉銀內通融支領是
養降夷之外尚減舊議二萬人之餉也今援兵至遼
者計每名之費不下二十五金至遼而可用者十不
得二三若夷虜弓馬原其本分一爲揀配卽是選鋒
而無安家行糧之費其利其害了然如列眉伏乞
天語申飾各鎮將前調家丁如數速發萬勿執留庶
軍聲益壯夷黨可殲矣

兵科郭允厚云據經臣揭開總兵賀世賢招納夷人

其男婦三千八百五十餘名。間以其強壯者補逃故軍丁之數。李光榮收真夷一千一百四十餘名。歸心主于就食。則歸降難以計多。寡將却之乎。則招之者何心。將受之乎。則養之者何術。有如強壯補至萬餘。則營軍大半胡虜聚之一營。誰能範其馳驅散之。各營逐處皆其醜類。倘飢烏暫爾向人。飽鷹終當颺去。是凶歲我爲逆旅之主人。豐年彼作還鄉之父老。于時我可遮其歸而畱其用否也。

禮科汪慶伯云。日者西虜降至六千餘。源源未艾。憂索降者。謂啟郭藥師之釁。憂受降者。謂犯來歙之戒。

還之恐罹悉怛謀之慘。安之復煩江統之論。已而隆
者在門。犯者在閭。如東西合謀。可不爲之寒心哉。况
經畧所招者東夷諸部。所收者西虜。無損于東。而樹
敵于西。從此謝絕。豈爲矛盾耶。

巡撫薛國用題。奴酋奸狡。每伺我之舉動。反所行而
就中取事。今日用夷。必須頭目傾心。方保無虞。此蠢
蠢來者。不過沿邊零星之窮夷耳。無論饑則就人飽
則颺去。見今巴領黃把都等頭目。差夷索賞。長安堡
已微啟其端矣。將來一不與而頭目皆與。我爲難甚。
則東西交合爲患更大。其可慮者。奴執宰酋日挾

其族黨代伊肆螫而卜兒亥之子又係奴壻今之降者安知其中無宰卜部落而藉名別種乎其可慮者二昔有開鉄北關東西間隔而金白又時偵交通之情以輸我今皆失陷矣東西只直任其往來又安知非夷狄暫竄西部而詭以報我者乎且賀鎮夙負勇名我倚之爲左右手奴視之爲眼中丁近蒲河回鄉生負唐元吉稱在奴寨時聞李永芳等日夜潛謀以啗賀鎮而賀鎮以數千降夷團聚瀋陽一有不測其禍寧止一帥乎其可慮者三乞勅諸臣亟蚤議妥俾邊臣知所遵守不致異日噬臍之無及也特科

臣蕭基蔡思克毛士龍曾汝召趙時用御史王業浩
馬逢臯徐揚先各有疏奉 旨下部議覆

兵部覆奏奴降一事關係遼左安危科道諸臣憂之
者深故其言之者切向撫臣之慮尤非事外遙度之
詞臣部亦恐西虜因而構釁或奸細潛伏其中已覆
令分散安插以後勿復再收矣今經臣疏一切揀配
卽是選鋒而無安家行糧之費每次收一千不獨屬
之賀世賢又將形迹可疑者委麻承恩王世忠朱梅
統領關防察其無他可用以戰始發各營又恐我若
不收慮必投入奴寨前後所收至五千四百不爲不

多以後東夷投降者經臣密察機宜無論多寡俱當
收納只宜防其奸細勿墮賊謀而西虜則在所緩蓋
自有遼事以來內外建議皆欲撫安西虜此等着數
終當照管兵机原不中制一見勝于千聞科道縷縷
言之正欲與經撫悉心商確事求其妥功求其成寧
有一毫成心作阻撓計耶

先時賀世賢久有異志廷弼心疑之使自爲一軍備
調遣不使定駐時時餽遺勞苦之稱其忠勇嘗歲節
宴集諸將勉以同心出血共軟已而諸將有密啟世
賢異者廷弼私語之曰吾向者軟血正爲此諸君自

慎可耳及袁應泰代任盡反廷弼之嚴而以寬收人
譽遂委任世賢不疑且懸招撫之令來投卽納諸帥
童仲揆泣諫應泰曰我自收不戰之功何不可而強
阻爲監軍高出亦諫曰來降者必彼有所不堪也今
奴酋方強何故舍之而投我又何故如此其多應泰
不聽曰我固欲空其巢耳今世賢與尤世功並駐瀋
陽世功所將一萬五千人世賢報納降夷六萬世功
密啟應泰曰世賢所報六萬實十萬也城決不可守
願以所統率自歸遼陽應泰乃始大駭然已無可柰
始以軍令令世功曰敢移一步者斬意欲畱世功

牽制之而勢已不能矣。童仲揆前守清河間與麾下
四人攀崖度鵝鵲關行叢箐中遇一人自奴酋老寨
逃出詢之乃楚兵也言奴酋諸子悉其精壯屯開原
新寨而老寨惟老酋獨居所俘南人置焉老寨去關
僅五十里耳仲揆請于應泰言關低易越以楚兵爲
導願率所將川兵五千直入老寨可使奴有腹背之
患應泰以爲險不應。亡何而奴已增高關隘置守清
河一帶山路盡行斬斷矣。蓋廷弼用權詐恩威測
故奴間不行。應泰左右皆間旋卽有以仲揆謀報奴
也。

聖諭遼左告急本兵居中調度責任匪輕該部尚書等官請告杜門堂屬空署豈成事體尚書崔景榮着力疾視事侍郎張經世已有旨卽出供職職方郎中仙克謹也着他出來不得藉口人言致悞彊事責有所歸其未到任侍郎兵部移文守催就道特諭

奴酋謀犯瀋陽按臣張銓先下令遷降夷于城外賀世賢不從將士憑濠而守降夷內應開門入賊尤世功没于亂軍賀世賢率其屬西奔○陳策童仲揆移兵皇山以遏瀋奉之衝分營扎橫河南賀世賢突至策開營納之遂爲所殺賊衆以仲揆所將皆川土兵

戒勿輕敵仲揆逐之大戰于河上斬賊二千餘裨將
周敦吉曰我輩不能抹藩在此三年爲何石柱司秦
邦屏先進渡渾河諸營畢進留戚金張明世統浙兵
三千陣河南諸渡河者未成列奴以鉄騎五萬四面
蹙攻之諸將殊歿戰斬賊墮馬者三千餘賊却而復
前如是者三自辰至酉奴騎益衆仲揆奮勇潰圍出
遣將請援于應泰應泰曰奴兵強決不可救不必又
添陷一枝人馬差官叩頭流血按院張銓再三激之
應泰曰此天數也銓怒罵而起仲揆望援不至兵盡
矢竭揮短兵親斬賊十七人賊復圍之萬弩齊發仲

揆於焉賊圍浙管浙兵以火器擊之賊死甚衆火器盡乃復接戰良久大敗將卒俱殲初按臣張銓檄朱萬良姜弼之兵屯虎皮驛爲奉集聲援及川兵渡渾河二將兵近數里觀望不敢動川兵旣敗乃領兵而前一與賊遇卽披靡四散賊是以得萃力攻浙管是役也以萬衆當虜數萬殺數千人雖力屈而殲亦奴難以來所未有之血戰也